



तुबारि

www.pangi.in
अब अंबेजी, हिन्दी त
पंगवाड़ी भाषा अन्तर असी।

Issue - 096,
June. 2020

इस मेहने तुबारि संस्करण तुसी हरालण जे अस सुआ खुश असे। छने पढुण जे एन्हि कथाई त कविताई पुठ चिकिण दिए। वापिस इस पन्ने पुठ एण जे पन्ने पड्डे दुतो विषय सूची पुठ चिकिण दिए। धन्यवाद

क्र.	विषय सूची	पृ.
1	कोरोना वाइरसे टेमे	2
2	सलाह	3
3	गरीब	4
4	किट्टी	5
5	गीहा बाहरी न निसे	6
6	देशे लिए यक मन्त्र	6
7	खरी गले गपे	7
8	कंजूस बुढी कथा	8
9	कतु खरु असु में ग्रां	10
10	शुरुवात अपफ केआं करे	12
11	चुटकले	13






कोरोना वाइरसे टेमे कुछ आदत/लिआगत

- पूरा टबरे बदले, सद यके मेहणु बाजार घिए त खरिददारी करे।
- भीड़ भाड़ ईलाके त दुकान केईआ दूर रिहे।
- बाजार अन्तर मेहणु केईआ कम से कम छे फीट दूरी बणाई रखे।
- होरी जुए साते भुन्ते टेम हमेशा अपु मुँह पुठ मास्क लाई रखे।
- बेवजह कोई भी समान ना छुए।
- भीड़भाड़ केआं बचुण जे बाजार ई टेम घेणे करे, जपल भीड़ कम भुन्ता।
- सामान गी आण कइ कुछ देर बाहर रखे, त बगैर हात खुर त मुँह धुए गी अन्तर ना घिए, होर ना केस छुए।



- हमेशा साबुण या सेनिटाइजर जोई हाथ साफ करे। कोरोना संक्रमण भुणे कोई बि लक्षण केएण लगे त बखरे बिशे, होर हस्ताइ घेई कइ अपफ जाँच करण दिए।

भारत देशे सचा नागरिक बणे, जिम्मेबार बणे।
अगर अस बणते जिम्मेबार, त कोरोना वाइरसे भुन्ति बुरा हाल।



विषय सूची

सलाह



बोक सुआ पुराणी भो। यक सुआ अमीर मेहणु थिया। यक रोज सेअमीर मेहणु अजागता बिमार भोई गा। तसे कुआ केस होरे शहर गओ थिया। अमीर मेहणु नौखर तसे शरांत बिशो थिया। जपल अमीर मेहणु हालत सुआ बिगड़ती गई त तेन झठ यक वसीयत लिखाई कि- “में मरण केआं पता सोब जौ-जायदाद त खजाने मालिक में नौखर भुन्ता। पर सोब जौ-जायदाद अन्तरा कोई बि यक चीज में कुआ पैठ कइ एईयाल त नौखर केआं मगी सकता।”

ईं शुण कइ नौखर सुआ खुश भुआ त से तसे कुआ एण भाड़ बिशा। केहि रोजे पता जपल अमीर मेहणु कुआ गी आ त से अपु बोउए वसीयत हेर कइ उदास भोई गा। तेस किछ बि समझ न थी एण लगे कि ईं कोऊं से यक चीज भो जे तेस मेईं सकती।

जपल तेस किछ बि समझ न आऊ त से शहरे यक खरे सलाह मशवरा देणे बाड़े केईं गा। तेन तेस सलाह बाड़े जे अपु बोउए वसीयते बारे बताऊ।



सोब बोक शुण कइ सलाह देणेबाड़े हसु त बोलु, “तें बोउ सचे बि सुआ अक्लदार थिया। अब तु झठ घेईं कइ यक चीजी जगाईं तेस नौखर मगी छड़।” अमीर मेहणु कोईए तिहांणि किऊ त सोब जौ- जायदाद जुओई साते तेस नौखरे बि मालिक बणी गा।

विषय सूची

गरीब



कमजोर लकड़ ई
हेरण जे मरो ई

चीरिए चालण त टलि छओ कमीरि
जीं टी बी ए मरीज ई।

से मेहणु....

में ग्रांए कुस्तरे जाए भेएड़, सीबरे बोडे पाईप अन्तर
बिश्ता।

कोई न जाणता कि से कपल एन्ता त कपल घेन्ता।
की खांता, की पींता?

छड़ीणे ई ठनियार अन्तर
बि मेई से यके चीरिए
चदूरु अन्तर उंघो काँओ
असा।



यक रोज तेस खुश हेर कइ,
मेई उतबली कइ झठ तेस केआं
पूछ छऊ कि भाई की बोक असी?

आज सुआ खुश नजर
एण लगो असा।

अउं हेरण लगो असा कि तें चेहरे
पुठ खरी रौनक अओ असी।

कि कोठि नियोको धन
मेओ असा ना, बे?

इ शुणते ई मोउं लगु कि से जीं

तड़फी गा।

जीं तसे कच्ची घा पुठ कनि हथ रख छडा।

विषय सूची

फि तेन अपु पीए दंत कीढ़े त
लेहरी कइ बोलु, 'बाबु जी,
अउं तुसी सची बोक बतांता।
अउं गरीब असा। में मजाक न
उड़ाए।

नेई मेओ मोउं कोई खजाना,
होर न मोउं कोई नियोको धन
मेओ असा।

मेई त आज सब्जी जुओई पेठ भरी कइ रोटी खो
असी।



किटटी



नमस्ते जी, अउं भो
किटटी। आज अउं बतांती
कि असी बुटी केआं की की
फाइदा भुन्ता। बुटे हेन्दे
शोलियार देन्ते। त हेन्दे
फल देन्ते, जे हें लिए
सुआ फाइदे बाड़े असे। बुटे हेन्दे सब्जी बि देन्ते। सोबी
केआं खास बोक ईं असी कि बुटे हेन्दे ऑक्सीजेन देन्ते,
जेसे बेलि अस जीन्ते रेहंते। ए मेंघे लाण जे बि मदत
कते। ए हइ अन्तर पाणि छल्हारी केआं बि असी
बचांते। ए हें घर बणाणे कम बि एन्ते। होर बि सुआ
जगाई बुटे हें कम एन्ते। फि किस अस एन्हि कटि कइ
अपु मौत अपु भेएइ आहण्ते। किस न अस बुटे लाऊं त
अपु जिन्दगी सुखी बणाऊं।



विषय सूची

गीहा बाहरी न निसे

बेवजहा गीहा बाहर निसणे जरूरत की असी?

मौत जुओई नजर मियाणे जरूरत की असी?

सोबी पता असा बाहरी बियारी मारणे बाड़ी असी?

ईहांणि मौत जुओई टक्कर नेणे मकसद की असी?

जिन्दगी यक भगवाने दुतो नेमत असी,

एस सम्हाड़ी कइ रखे।

दिल बहलाण जे गी अन्तर बजहा सुआ असी।

ईहांणि गैहाई गैहाई भटकणे की जरूरत असी?

अपु गी बिशे ताकड़े बिशे।



देख भाई

जरूरत और जबरदस्ती में अंतर तो समझो
ये एक महामारी है इसे मजाक ना समझो!!

#CORONAVIRUS #STAY HOME STAY SAFE

www.shayari.guru

Shayari Guru

देशे लिए यक मत्र

अपु बचाव करणे बेलि ई देशे बचाव भोई सकता,

अपु अपफ बदलाव करणे बेलि ई देशे अन्तर

बदलाव भोई सकता,

अपु चौकसी करणे बेलि ई

देशे रक्षा भोई सकती,

समाजिक दूरी रखणे बेलि ई

कोरोना वाइरस हें देश

केआं दूर भोई सकता।



विषय सूची

खरी गले गपे



खिलवाड़ ना कर।

यक मतरे होर मतर केआं पुछु, “मतरे मतलब की भुन्ता?” मतरे मुस्कराई कइ जवाब दता, पागल यक मतरे ई त भुन्ता जेसे कोई मतलब न भुन्ता। होर जेठि मतलब भुन्ता तठि कोई मतर न भुन्ता।



अन्तर सोब किछ असु, पर सबर नेई।

स्वर्ग अन्तर सोब किछ असु, पर मौत नेई। ग्रंथ अन्तर सोब किछ असु, पर झूठ नेई। संसार अन्तर सोब किछ असु, पर शांति नेई। इन्सान

धाणि त तसे जुएली केआं अब सते बंटी अठ फेरे लवाण चाहिए। सत फेरे तेन्के व्याहे, अठुं जे फेरा असा, से कुई जे लवाण चाहिए कि से कुई बचान्ते त तेस पढ़ान्ते ।

धिक सोचे



विषय सूची

कंजूस बुढी कथा

बोक सुआ पुराणी भो। यक ग्रां यक बुढी थी। से अपु गी अकेली भुन्तीथ। तसे होर कोई ना थिया। से बुढी सद कपले कपले अन्तर रोटि शाग बणान्तीथ। बाकि होरे कम जे से ओती कोती बड़ मेहणु हक दी दी कड़ भिआन्तीथ, पर से बुढी सुआ कन्जूस थी त केसे यक भुरुक पुओणि पियाई कड़ मेहणु तसे कम करण जे एन्त पुओणि बि न पियान्तीथ। पतियान्तीथ। बुढी ई चाल हे तसे कम करण जे ना घेन्ता थकि घेन्तीथ। पर कोई जेई



ऑ, अगर कोई जेई तसे दुआरे बड़ गा त बुढी टाई टुड़ कड़ तेन्हि भीं रखतीथ त चरे तकर बोकी बश घेन्तीथ। पर यक भुरुक पुओणि बि न पियान्तीथ। ऑ जिखेई मेहणु घेण लगे, तिखेई बुढी बोतीथ “बिशे बे, अउं चाह बणान्ती। पर मेहणु तसे पता थिया कि बुढी रोज के ईहांणि बोती, पर चाह केसे न पियाती।



तोउं केहि रोज पता यक मेहणु तसे दुआरे बड़ घेण लगो थिया त बुढी तेस जे हक दीती “ईए आई, भीं बिश।” से मेहणु खरा चलाक थिया त बुढी अन्तर घेई गा। तोउं बुढी तेस जुओई बोकी लगी, लगी त सऊ दी टेमी बि पता न लगा। तोउं चरे भोई गोऊ त तेन मेहणु बोलु “बस, अउं घेन्ता।”

विषय सूची

तसे बोक शुण कइ बुढी फि बोलुण लगी, “अउं धिक तोउ जे चाह बणाती। दे बे कोईया मोउं केई किछ समान नेई कि करण, लुण पिपी पिहिणे बती त न दियल तेन्हे?” तेस मेहणु बुढी पूरा पता थिया कि बुढी कति कन्जूस असी। ए ईं त किछ न देन्ती। तोउं तेन मेहणु बोलु “बे बुढी मईए, ठीक असी। आज अउं बती खान्ता, तोउ केई बती असी ना?” बुढी बोलु “आँ बे कोईया, बती के त कोई ढेई असा। पर तु एस बती कीं खांता।” तेन मेहणु बोलु “अउं एस कीं खांता, मईए तु हेरी बिश त पेहले एस बती धोई कइ इए दे त यक लंसुइ बि दे।” बुढी बती धोई दीति त यक लंसुइ बी दितु।

तेन मेहणु अगी आग जाई त लोउस अन्तर बती त पुअणी छई कइ उधाण पुठ छई छऊ। जिखेई लोसुइ लुख आई त तेन मेहणु बोलु, “धिक भइ चऊ भुन्तेथ त कि केहणा थिआ।” तोउं बुढी बोलु, “मोउं केई चऊ असे, अउं घिन एन्ती।” बुढी चऊ घिन आई त तेन मेहणु चऊ धोई कइ लोउस अन्तर छई छड़े। जिखेई चऊ लुखि गे त तेन मेहणु बोलु, “धिक भइ दुध भुन्तुथ त की खरु भुन्तुथ।” तोउं बुढी बोती “मोउं केई दुध असु, अउं दुध देन्ती।” तोउं बुढी दुध दुतु त तेन मेहणु दुध चोई बुच छई छऊ। फि लंसुस अन्तर लुख आई त तेन मेहणु बुढी जे बोलु, “अगर धिक भइ खन्न भुन्तीथ त तोउं त कि मज्जा एण थिया।” तोउं फि बुढी बोलु “बे कोईया, मोउं केई खन्न असी। अउं बेहियां खन्न घिन एन्ती।”



विषय सूची

तोउं बुढी खन्न घिन आई त तेन मेहणु खन्न चोई
 बुच छई छड़ी। तोउं तेन मेहणु लउंस अन्तर खरा चा
 दी कइ बती भीं कीढी त चठि कइ बोलु “आँ हा! कतो
 अब्बल स्वादे बाड़ी खीरण बणी। तोउं तेन मेहणु बोलु,
 “बुढी मईए, भुओ खड़ी।
 दुई मंगेई टा त तेई मेई
 अपु खीर खांते।
 जयसिंह चौहान



कतु खरु असु में ग्रां

आज भ्यागे जिखेई अउं खइ
 भुआ त मेई अपु गीहे भखेरी
 गलेजे बइ बाहरी हेरुण लाओ थियु।
 तिखेई मोउं अपु पुरु ग्रां केऊ त
 में मन ती अब्बल लगु किस
 कि आज मौसम धीक बदेआ ई थिये
 छिटयाण ई लगो थिया। बाहरी पुरु नोउ घास तीं अब्बल
 लगण लगो थी त में नजर यकदम अपु पुरु ग्रां बठ
 लगी त से ती अब्बल लगण लगो थियु। किस कि तेठी
 सोब मेहणु कोउं की करण लगो थिया, कोउं कि करण
 लगो थिया। इ बोक जेठे मेहने भो किस कि कुछ मेहणु
 अपु बगी जे चूर घिन कइ नशो थीए। अगर अगर
 हिएटुइ त जूण बाण, तेस केआं पता चुरे बाड़ा त तेन्हि
 देसे, फुणे बिएजु बी साते नियो थी। तेस केआं पता में
 ध्यान होर कना गा। मेहणु अपु गौड़े त बकिरी ढेडुइ
 घिन कइ नशो थिए



विषय सूची

ईए मोउं जे बि हक दिती त बोलुण लगी “कोईया! एन्हि गोरु बहेरी छाणा।” अउं भखेरी केआं बाहरी नसा दे मेई अन्तर घेई कइ अघलोट खोला। तेस अन्तरा ढेडुइ बकिरी बहेरी नसण लगे। तेन्हि जोई तेन्के कियऊ त छियडु बी नसण लगे। से टाते दे चोकु अन्तर छे। तेस केआं पता मेई से निए त अउं शुहां घे गा त सोब जेई अपु अपु गोरु घिन अओ थिए। तेन बइ हारे मेहणु अओ थिए से बोलणु लगे कि तुं ग्रां सोबी केआं जादे ढेडुइ बकिरी असे। मन अन्तर ती खुशी भुई कि अस सोबी केआं अब्बल जगही असे, किस कि हैं ग्रां केआं पुरु कलाइ केतु। अब अउं मन अन्तर सोचण लगा कि जीं कोई ए कलाइ शान भो। हैं इए पधरे पधरे बग असे त हैं ग्रां सोबी जुओई भाईचारा यक होरी जोई खरा असा। यक होरी जोई उई मी कइ बिशते। हैं ग्रां ठन्हु पुओणी असु। पेहले केआं त अब हैं ग्रां ती अब्बल भो असु त तरक्की कना जे घेण लगे असु। तेस



किआं पता जिखेई अउं तेस खुआब किआं बाहरी आ त अउं अपु शहाइ गा। तेठि मेई सुआ घेरी सब्जी लओ असी, जेस मगण जे मोउं केई सुआ जेई अओ थिए। अउं यक दुई शहाइ सब्जी सोबी कें धे देन्ते गा।

विषय सूची

शुरुवात अपफ केआं करे



यक सधुबाबे आश्रम थिआ। तेस सधु दुई चले थिए। यक रोज सधुबाबे सोचु कि आज अउं एन्के परिक्षा नेन्ता। सधु बाबे अपु दुहे चले

भिए, त तेन्हि दुहि के धे गुलाबे फियुड बड़ भरो यक यक चहगोडू दिते, त बोलु “जे मेहणु तुसी दुहि हसते हसते मेईयाल त तसे धे तुसी यक गुलाबे फियुडु दी छाण।” ई बोल कइ सधु बाबे से दुहे जेई अपु अपु बत लंघाई छडे।

ब्यादी जे दुहे चले वापस एई गे। यक चले चहगोडू पूरू कि पूरू भरोरु थियु त होर तसे चहगोडू पुरु शुन्नू थियु। सधु बाबे दुहि केआं पुछु त यक तेनि बोलु कि “गुरु जी जेस जगाई तुसी अउं लंघाओ थिया, तेठि कोई जेई हसण नओथ लगो।” होरे चले बोलु “गुरु जी जेस जगाई तुसी अउं लंघाओ थिया, तेठि त सोब हसण लगो थिए। किस कि पेहले अउं हसी कइ तेन्के हेरण लगो थिया, त से बि मोउं हसता हेर कइ हसण लगते। ई कर कइ फि अउं तेन्के धे यक गुलाबे फियुडू दी छताथ। ई कर कइ में सोब फियुडू खत्म भोई गे।

सधु बाबे तेस चले पीठ पुठ हथ रखा त बोलु कि सही अन्तर तेई में जाने

मतलब समझा। आज

शुरुवात असी अपु अपफ केईआं करीण चाहिए।



विषय सूची

तुबारि मासिक पत्रिका

- तुबारि मासिक पत्रिका ई उम्मीद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।
- इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगी घाटि अन्तर पढुं जे त भाषाई सुहलियत करण जे इ पत्रिका शुरु किओ असी।
- तुबारि यक अवाणिज्यिक पत्रिका भो।
- तुबारि पत्रिका कोई मेहणु] जनजाति] त संस्कृति गलती कढेण जे नेई छपाण लगे। अगर कोई ई सोचता बि त अस जिम्मेवार नेई।
- छपाणे पेहले सोब आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- आर्टिकलस ना मिलए, या घाटि मेहणु के साथोट ना मिलए त तुबारि पत्रिका कदी बि बंद भुई सकती।
- कोई चीज छपां असी या नेई छपां जे तुबारि संपादकीय टीम पुरा अधिकार असा।
- अस किलाड़ केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर अर्टिकलस रखुं जे सुविधा किओ असी।
- अस सोबी पांगी मेहणु जे हात जोड़ कइ अनुरोध कते कि तुस बि कोई अछा अर्टिकल पुराणि या नोई कथा, कहावत, कविता, त नोई घीत (पागवाड़ी अन्तर लिख कइ छपां जे हेंघे दिए।

तुबारि संपादकीय टीम

9418429574
9418329200
9418411199
9418904168
9459828290



मास्टर जी: रीतू, आज तु स्कूल चरे किस आई?

रीतू: गुरु जी, मेई गिहा दश रुपेई सिक्का आहणतो थिआ, पर बथ से फटेई गा। अउं तेस तोपण लगे थी।

मास्टर जी: होर शिवांगी, तु चरे किस आई?

शिवांगी: गुरु जी, मेई से सिक्का अपु खुर पढे चिखि रखो थिआ।



यक मोटे मेहणु यक कुआ केआं पुछु: बे कोईया रवि जपल तु मोउं जतर भोल त की कता?

रवि बोलु: जी कमजोर भुणे कोशिश कता।



टींझी हाथी जे: तु अपु कमीरी मेन्धे दे।

हाथि: किस?

टींझी: में कुई ब्याह असा त टेन्ट लाण असा।

विषय सूची